

四庫全書

經部

欽定四庫全書

埤雅卷九

宋陸佃撰

釋鳥

溪鷺

鷓鴣

梟

鴉

脊令

桑扈

鷩雉

鵠

杜鵑

雀

鸚鵡

鴉

戴勝

鷓鴣

溪鷺

溪鷺五色尾有毛如船拖小於鴨沈約郊居賦所謂秋鷺寒鷺脩鷓短鳧是也性食短狐在山澤中無復毒氣故淮賦云溪鷺尋邪而逐害此鳥蓋溪中之勅邪逐害者故以名云鵠之步網鷺之畫印溪鷺之勅螺羸之祝皆物之有術智者也陳昭裕建州圖經曰溪鷓於水渚宿先少若有勅令也亦其浮游雄者左雌者右羣伍皆有式度

鷓

鵙伯勞也陳思王惡鳥論曰伯勞以五月鳴應陰氣之  
動陽氣為仁義陰氣為殘賊伯勞賊害之鳥也其聲鵙  
鵙故其音名云月令仲夏曰鵙始鳴是也釋鳥云鵙鵙  
醜其飛也鵙言其飛不能翱翔竦翅上下而已許慎說  
文以為鵙斂足也今鵙鵙醜飛亦皆斂足腹下詩曰七  
月鳴鵙八月載績蓋倉庚知分鳴鵙知至故陽氣分而  
倉庚鳴可蠶之候也陰氣至而鵙鳴可績之候也舊云  
鵙善制蛇鳴則蛇結類從曰鵙鳴在上蛇盤不動鵙鳴

在上蝟反不行或曰金得伯勞之血則昏鐵得鷓鷃之膏則瑩石得鵲髓則化銀得雉糞則枯

### 梟

梟食母說文云不孝鳥也故日至捕梟磔之字从鳥頭在木上古者天子以春解祠黃帝用一梟破獍說者以為梟名食母破獍食父破獍如羶者而虎眼一曰獍如虎豹而小始生還食其母故曰梟獍黃帝欲絕其類使百司用之故後世於歲始祓除凶災取以解祠黃帝漢

使東郡送梟五月五日作羹以賜百官此遺象也舊說  
梟性食母始飛北山錄曰烏反哺梟反噬蓋順逆之習  
也聽聲考詳篇云鶴聲宜學仙雉聲宜習武烏聲宜習  
醫鴈聲宜習卜筮鵲聲宜習工巧梟聲宜習符呪釋鳥  
曰梟鳩土梟也西方之書曰如土梟等附塊為兒名之  
曰土梟蓋取諸此傳曰甌瓦可以令梟寂又曰梟避星  
名鵲違歲子

鴉

鴉大如斑鳩綠色所鳴其民有禍證俗云鴉禍鳥也今謂之畫烏蓋聲之誤也草木疏曰惡聲之鳥也入人家凶賈誼所賦鵬鳥是也其肉甚美可為羹臠又可為炙故莊子曰見卵而求時夜見彈而求鴉炙也詩曰翩彼飛鴉集于泮林食我桑黹懷我好音言鴉食桑黹則變而美其色好其音以況德義能革小人之非如此及其食梅則不足以革其容色變其聲音故詩曰墓門有梅有鴉萃止以刺陳佗無良師傅也北山錄曰黃鸝亦食

桑黜而音美一曰鵬似鴉則鴉又非鵬矣異物志曰鳥如小雞體有文色異俗謂之鵬不能遠飛行不出域賈公彥曰鴉鵬二鳥夜為惡鳴者也傳曰夏雀生鴉楚鳩生鴉廣志曰鴉楚鳩所生如驢巨虛種類不孳乳也玉堂閑話云驢馬駒隨母行有在前者有與母並者有隨後者此由生時爾月初生者在前月半生者處中月末生者居後嘗驗問數輩亦不謬爾始知含靈之類皆稟四時五行之氣也今科斗月大盡先生前兩足小盡先



生後兩足

脊令

釋鳥云鴨鵝雛渠蓋雀之屬飛則鳴行則搖大如鵝長脚尾腹下白頸下黑如連錢故杜陽人謂之連錢詩曰脊令在原兄弟急難脊令水鳥首尾相應和之至也今反在原則失其所矣故以取況兄弟急難其首尾相應如此義訓曰鴨鵝錢母其頸如錢文詩曰題彼脊令載飛載鳴說者以為脊令不能自舍君子有取節爾其鳴

自呼或曰首尾相應飛且鳴者故謂之雖渠渠之言勤也物類相感志曰俗呼雪姑其色蒼白似雪鳴則天當大雪極為驗矣

### 桑扈

淮南子曰馬不食脂桑扈不啄粟非廉也桑扈蓋一名而二種若魯有兩曾參也釋鳥云桑扈竊脂鴝鵒剖葦此桑扈之一種也桑扈竊脂棘扈竊丹此桑扈之一種也蓋對剖葦言之則竊脂者所謂青質背曲食肉好盜

脂膏者是也對竊丹者言之則竊脂者所謂素質其翹  
與領皆鶯然而有文章者是也左傳曰九扈為九農正  
扈民無淫者也賈逵樊光以為春扈趣民耕種夏扈趣  
民耘耔秋扈趣民收斂冬扈趣民蓋藏棘扈為果驅鳥  
桑扈為蠶驅雀行扈喑喑晝為民驅鳥宵扈嘖嘖夜為  
農驅獸老扈鷦鷯則趣民刈麥令起不得晏者也說者  
非之以為入林為果驅鳥入室為蠶驅雀晝驅鳥夜驅  
獸窮日通宵常在田野非先王所以建官之意則亦以

誤矣蓋九扈農桑候鳥扈民無淫者也故先王名官以主農桑之事取其意云爾非謂依此諸扈使之動作也蓋如棘扈則主園事爾桑扈則主蠶事爾驅鳥驅雀非所以為難也然則所謂交交桑扈率場啄粟者正以其性之竊脂者言之也故以啄粟為失其性交交桑扈有鶯其羽者正以其色之竊脂者言之也故其序曰君臣上下動無禮文焉蓋君子素以為質而文之者禮也釋獸曰虎竊毛謂之虢貓鼯如小熊竊毛而黃竊毛皆謂淺

毛則夏扈竊玄言淺黑秋扈竊藍言淺青冬扈竊黃言  
淺黃棘扈竊丹言淺赤桑扈竊脂言淺白固其理也且  
爾雅主詩言之而小雅桑扈所取者有兩竊脂故爾雅  
亦兩解也猶之無羊云九十其牯良耜云殺時牯牡爾  
雅有黑脣牯又有牛七尺為牯是也

鷩雉

鷩似山雞而小冠背毛黃項上綠色鮮明胃腹洞赤西  
山經所謂赤鷩可以禦火者也賦性悍戾憨害飛走如

風之焱故潘岳云山鷲悍害焱迅已甚也蓋其耿介甚於佗雉故周官三公服鷲冕與王后三翟之服異也劉熙釋名云鷲冕鷲雉之態惡者山雞也鷲態也性急慙不可生服必自殺故畫其形於衣以象人執耿介之節博物志曰山雞有美毛采自愛其色終日映水目眩則溺翟雉長尾雨雪降惜其尾棲樹杪不敢下食往往餓死蓋文之溺物也如此然則士之涉世不能忘己之美而至於以文滅質者亦已惑矣羽物之色莫美於鷲以

其美斃焉互物之味莫美於斃以其美斃焉是以物惡  
有其美也禽經曰霜傳彊枝鳥以武生者少雪封枯原  
鳥以文死者多

鵠

鴻鵠一舉千里故周官木路前樊鵠纓蓋取諸此又曰  
革路龍勒條纓龍勒猶此所謂鵠纓蓋行天莫如龍行  
地莫如馬而度人八尺以上為龍六尺以上為馬馬以  
龍名其來尚矣司裘王大射則共虎侯熊侯豹侯設其

鵠設其鵠者棲鵠於侯中以為的者也若今所射紅心是也謂之鵠者取名於鵠鴻鵠一舉千里射者難中以中之為雋也梓人云張皮侯而棲鵠皮侯所謂三侯是也先儒申鄭以為其鵠還以虎熊豹麋之皮為之按鵠取名於鳥則或畫或刻或以其毛為之雖不可知然知其不以虎熊豹麋之皮為之明矣今鵠善步鳧善趨鷹善立禽經曰鳥鳴啞啞鸞鳴雍雍鳳鳴喈喈皇鳴啾啾雉鳴鷩鷩雞鳴咿咿鶯鳴嚶嚶鵲鳴喞喞鴨鳴呶呶



鵠鳴喏喏鳴嗅嗅字說云鵠遠舉難中中之則可以告故射侯棲鵠中則告勝焉

杜鵑

杜鵑一名子規苦啼啼血不止一名怨鳥夜啼達旦血漬草木凡始鳴皆北嚮啼苦則倒懸於樹說文所謂蜀王望帝化為子鵠今謂之子規是也至今寄巢生子百鳥為哺其雛尚如君臣云爾雅曰鵠周即此鳥也臨海異物志曰鵠鵠一名杜鵑至三月鳴晝夜不止按楚辭

曰恐鷓鴣之先鳴兮使夫百草為之不芳則杜鵑似非  
鷓鴣服虔曰鷓鴣一名鵙此言是也蓋陰氣至而鵙鳴  
故百草為之芳歇或曰鷓鴣春分鳴則衆芳生秋分鳴  
則衆芳歇所未詳也

### 雀

雀賦曰頭如顆蒜目如擘椒雀物之淫者鼠物之貪竊  
者故詩言雀角鼠牙以譬彊暴西方之書以為淫人受  
果其報雀鵠鴛鴦雀固物之淫者也今鵠喜合凡鳥皆

雄乘雌鳴此鳥雌乘雄又雀四時有子鵠逐月有子周  
蒙續雀豹古今注曰九月雀入水不則多淫泆酒善使  
人淫泆故一升曰爵爵所以戒也亦取其鳴節足所以  
戒荒淫之飲舟以戒沈湎爵以戒淫泆其義一也先儒  
圖禮以為爵漆赤中其下刻為雀形蓋爵之制其上如  
斛下為雀形故漢律歷志稱斛以為其狀似爵以縻爵  
祿也爵散之爵出於爵燕饗之燕出於燕一則以為法  
一則以為戒先王之禁勸有在於是故孔子欲學者之

多識也或曰爵狀似斛不為雀形按說文解爵曰禮器也象爵之形中有鬯酒又持之也則爵為雀形明矣西方之書曰雀浴沙受卵師曠禽經曰雀交不一雉交不再又曰雀以猜瞿今雀俛而啄仰而四顧所謂瞿也說文以為鷹隼之視誤矣太玄曰明珠彈肉費不當也言所用者重所要者輕朝野僉載曰叱雀官倉猶是向公故書之所貴者意也舊說鳥雀尾翠上有肉高有穴者名脂餅鳥雀每引觜取脂以塗翅毛衣則悅澤雨露不

能濡又云雀爭燕巢銜艾置巢中燕不復顧也

鸚鵡

鸚鵡人舌能言青羽赤喙其狀如鴉鷓鴣賦所謂蒼鷹  
鷲而受縲鸚鵡慧而入籠者也曲禮曰鸚鵡能言不離  
飛鳥猩猩能言不離禽獸舊說衆鳥足趾前三後一其  
目下睜眈上唯鸚鵡四趾齊分兩睜俱動如人目南方  
又有鸚鵡者里兒剔其舌端教以語言甚慧禽經曰鸚  
鵡摩其背而瘖鸚鵡剪其舌而語是也或曰鸚以聲交

而孕鵲以意交而孕鳩鵲以晴交而孕鸚鵡以足交而孕舊說鸚鵡不踰濟又穴居故春秋夏有鸚鵡來巢以異書也鳥似鴟而有憤禽經曰冠鳥性勇帶鳥性仁纓鳥性樂冠鳥若鷹是也帶鳥若練鵲是也纓鳥若綬鳥是也綬鳥一名鷗亦或謂之吐綬咽下有囊如小綬五色彪炳吐有時風不吐雨不吐有驚懼之虞亦不吐詩曰中唐有甕印有音鷗言不戕賊之故中唐有甕不驚懼之故印有音鷗也一名避株蓋行必遠草木慮觸其

喙亦曰真珠雞體有真珠點文食之甚美詩謂之旨以此或剖其喙不復有綬綵矣字說曰嬰不能言已而能言母從人而後能言

鴝

郭璞曰鴝似鴈無後指毛有豹文一名獨豹遇鷲鳥能激糞禦之著其毛悉脫說文曰肉出尺裁焦贛易林曰文山鴻豹肥脂多脂蓋言此也閩諺曰鴝無舌兔無脾蓋鴝無舌連蹄性不木止詩曰肅肅鴝羽集于苞栩肅

肅鴉翼集于苞棘肅肅鴉行集于苞桑言鴉無舌性不  
木止又其飛肅肅勞苦然其於苞栩苞棘苞桑也尚得  
以其類集聚衆羽而成翼聚衆翼而成行今君子無所  
於愬下從征役又不得養其父母則鴉之不如也說文  
曰車相次也从七从十蓋鴉性羣居如鴈自然而有行  
列故从车詩曰鴉行以此故也段氏云鴉鴨亦齡

戴勝

釋鳥云鴉鴉戴勝郭璞曰鴉即頭上勝也今亦呼為戴



勝戴勝一名戴鷩頭上有毛花成勝故曰戴勝也通典  
曰上古衣毛帽皮後代聖人見鳥獸冠角乃作冠纓而  
吟此鳥頭上戴勝則又冠角之別也三月飛在桑間蓋  
蠶生之候月令所謂戴勝降于桑是也方言曰鴝鳩自  
關而東謂之戴鷩似誤蓋鴝鳩布穀也按今男事興而  
布穀鳴女功興而戴鷩鳴則鴝鳩與戴勝異雄之言非  
蔡邕月令云鴝鳩鶉鳩也鴝先是時鳴故稱鳴拂猶搏  
也陽氣所感故搏羽戴勝降于桑以勸民事也春秋傳

曰鶻鳩氏司事也見鳩拂羽戴勝降桑則具筐筥詩云  
女執懿筐遵彼微行爰求柔桑

鶻

鶻一名述似燕紺色知天將雨之鳥也故傳曰知天者  
冠述而莊子曰皮弁鶻冠以約其外字从喬喬述也鶻  
知天時而述之者也義訓曰鶻紺燕知風則啼商羊一  
足雨則舞然則鶻之為鳥非獨知雨又亦知風也蘇子  
所謂蚌鶻相持者鶻曰今日不雨明日不雨必有死蚌

蚌曰今日不出明日不出必有死鵝兩謂開口一本作  
雨非是異物志曰翠鳥先高作巢及生子愛之恐墮稍  
下作巢子生毛羽復益愛之又更下巢也亦自銜其毛  
羽日浴澄瀾泗淵之間鮮緝可愛或謂之翡翠名前為  
翡名後為翠舊云雄赤曰翡雌青曰翠其小者謂之翠  
碧一名魚虎一名魚師性善捕魚故曰魚師魚虎也荆  
王以其羽毛飾被左氏傳所謂翠被豹舄是也今花工  
亦取以為婦人面飾俗說翡翠各據溪曲以居以自藏

匿猶雉之分畿雖飛不越分域也素問曰青如翠羽者  
生黑如烏羽者生赤如雞冠者生黃如蠙腹者生白如  
豕膏者生此五色之見生也

埤雅卷九

埤雅卷九音釋

鷲勅

鷓式

鷓決

鷓糝

鷓布覓

獍竟

獍樞

袂拂

臙乎各

黠甚

鴟即

鴟刁

鴟棧

鴟而純

鴟撇

雋祖克

鷲以沼

呬乎甲

呬號

漬積

雋胡圭

鷲題

洵免

俛俯

餅餅

縹綫

臉檢

眨挿

鷲鷲

甍關

卬窮

鵠保

裁恣

脂徒骨

齒丑之

鴿力唐

鴿皮及

鴿女林

鴿以律

鴿其律

銜胡絹

鴿昔

欽定四庫全書

埤雅卷十

宋陸佃撰

釋蟲

螳

蠅

蠛蝚

蠋

蜂

蝥

蝮蛇

蛇

虺

蚺蛇

螂蛆

螢

蟋蟀

蝓蟻

阜螽

蝻蟻

蛾

蠶

蝶

莎雞



螳

莊子曰道在螻蟻螳有君臣之義故其字从豈亦或从義善鬪力舉等身鐵鬪輒酣戰不解有行列隊伍化書曰螻蟻之有君也一拳之宮與衆處之一粒之食與衆蓄之一罪無疑與衆戮之書曰王麻冕黼裳卿士邦君麻冕蟻裳黼裳明王於此斷恩而蟻裳則言以申君臣之義也詩曰鶴鳴于垤垤蟻冢也蟻將雨則出而壅土成峯鶴鳥見之長鳴而喜方言曰其場謂之坻亦或謂

之埴埴从至以螳之微而能為埴用其至故也今蟻取  
小蟲入穴輒壞埴室穴蓋防其逸亦以室雨易占所謂  
蟻封其穴大雨將至是也一名蟻封傳曰蟻封盤馬孟  
子曰泰山之於丘埴趙岐曰埴蟻封也今朔地蟻封其  
高大有如冢者所謂蟻冢蓋出於此莊子曰於蟻棄知  
於魚得計於羊棄意言慕人與使人慕之皆不可為也  
故至人之計在於物我兼忘其藏也不厭深眇而已矣  
又曰堯非有人非見有於人也故曰得時則蟻行失時

則鵲起蟻行透遲有序需而不速故君子之得時其廉於進如此夏小正曰玄蚰賁玄蚰也者蟻也方言曰梁益之間謂之玄蚰符子曰鼈之冠山蟻之戴粒其於逍遙一也此即南華鵬鷁之義言大小雖殊而理各至足豈容勝負於其間哉

蠅

蠅好交其前足有絞繩之象故繩之為字从蠅省準生於隼繩生於蠅其義一也亦好交其後足搖翅自扇故

爾雅曰蠅醜扇也段氏云蒼蠅聲雄壯青蠅聲清聒其聲皆在翼又曰青蠅糞尤能敗物雖玉猶不免所謂蠅糞點玉是也蓋青蠅善亂色蒼蠅善亂聲故詩以青蠅刺讒而雞鳴曰匪雞則鳴蒼蠅之聲也一章曰蒼蠅之聲言耳聞疑而起也二章曰日出之光言目見似而起也青蠅首赤如火背若負金蒼蠅又其大者肌色正蒼今俗謂之麻蠅傳曰以冰致蠅蠅逐臭者懷蛆紫利常喜煖而惡寒故遇冰輒側翅遠引所謂夏蟲不可與語

冰者也類從曰蠅生於灰蓋蠅值水溺死以置灰中須  
吏即活淮南子以為爛灰生蠅正此謂也張敞書曰蒼  
蠅之飛不過十步託於騏驥之髮則致千里此言附善  
之益有如此也

蠨蛸

釋蟲云蠨蛸長踦蕭梢長踦之貌因以名云郭璞曰今  
小蜘蛛長股者俗呼喜子亦如蜘蛛布網垂絲著人衣  
常有親客至荊州河內之人謂之喜母陸子曰乾鵲噪

而行人至蜘蛛集而百事喜蓋謂是也詩曰蠨蛸在戶

蠋

大蟲如指似蠶一名厄詩曰條革金厄金取其堅厄取其完也又曰蛸蛸者蠋烝在桑野言蠋以絲自裹又久在桑野雖獨而已然其自營也完矣故詩以此託況序曰一章言其完也韓非子曰螾似蛇蠶似蠋人見蛇則驚駭見蠋則毛起然婦人拾蠶而漁者握螾故利之所在皆為資育莊子曰奔蜂不能化藿蠋以言材之有大

小故孟公綽為趙魏老則優不可以為滕薛大夫管子  
曰夫龍欲小則化為蠶蠋此言龍化為蠋而已然抱朴  
子以為有蛇蠋化成之龍意者天下有自然之龍有蛇  
蠋化成之龍乎故曰或生而知之或學而知之及其成  
功一也

蜂

蜂有兩衙應朝其主之所在衆蜂為之旋繞如衛誅罰  
徵令絕嚴有君臣之義化書曰蜂有君禮也其毒在尾

垂穎如鋒故謂之蜂傳曰蜂蠆垂芒此之謂也詩曰莫  
予荇蜂自求辛螫荇使也荇蜂使人為辛螫之譬也言  
蜂善辛螫藏精育毒雖小不可不慎採取百芳釀蜜其  
房如脾今謂之蜜脾其王之所居疊積如臺語曰蜂臺  
蟻樓言蜂居如臺蟻居如樓也一名蠟蜂蠟生於蜜而  
天下之味莫甘於蜜莫淡於蠟蓋厚於此者必薄於彼  
理之固然也西方之書曰味如嚼蠟舊說蜂之化蜜必  
取叵猪之水注之蠟房而後蜜成故謂之蠟者蜜之蹠



也方言曰其大而窠謂之壺蜂即今黑蜂蓋亦釀蜜楚辭所謂赤蟻若象玄蜂若壺者也黃蜂亦其一種無窠纖長其窠仰綴於屋銜漆以固其蒂陰陽在尾喜合末端有岐者牝銳者牡也爾雅曰蠶醜螿螿垂腴也一名萬其字象形蓋蜂類衆多動以萬計故借為萬億之萬舊說數人以千數物以萬莊子所謂號物之數謂之萬也抱朴子曰雞有專棲之雄雉有擅澤之驕蟻有兼弱之智蜂有攻寡之計援理觀之人之強弱相制衆寡相

役何以異此是故齊與魏闕而莊周以為戰於蝸角也  
束皙發蒙記曰蠅生積灰蜂出蜘蛛自然論曰蜂無王  
而盡死

螽

螽斯蟲之不妬忌一母百子者也故詩以為子孫衆多  
之況鵲巢言夫人德如鴉鳩能均養七子而已是詩乃  
稱后妃之子孫衆多如此者蓋太姒則百斯男文王之  
所以聖也文王之所以聖者天道也召南則人道而已

何足以與此華封人曰祝聖人多男子堯曰辭多男子則多懼華封人曰始也我以汝為聖人邪今然君子也螽斯一名春黍亦或謂之春箕草木疏云蝗類青色長角長股股鳴者也或曰似蝗而小股黑有文五月中以兩股相切作聲聞數步者是也詩曰五月斯螽動股言螽斯股成而奮迅之也爾雅曰螽醜奮蓋於是時股成而奮迅之則方春尚弱也故列子以為臣力折春螽之股堪秋蟬之翼蔡邕月令曰其類乳於土中深埋其卵

江東謂之蚱蜢善害田穉公羊曰蝮何以書記災也蚻何以書記異也字蓋从冬冬終也至冬而終故謂之蝮魯十月而有蝮孔子曰火伏而後蟄者畢今火猶西流再失閏也

騰蛇

騰蛇龍類也雄鳴於上風雌鳴於下風而風化能興雲霧而游其中慎子曰騰蛇游霧飛龍乘雲雲罷霧除與蚯蚓同失其所乘故也騰蛇能騰蟲之自勝者也荀子

曰騰蛇無足而飛梧鼠五枝而窮言梧鼠之技雖多不  
如騰蛇結於一也鬼谷子曰分威法伏熊實意法騰蛇  
實意言致一也騰蛇一名神蛇亦曰靈蛇墨子曰靈龜  
近灼神蛇近暴傳曰靈蛇棄鱗神龍解角以言至人達  
士超世拔俗委蛻萬物之上抱朴子曰兔不牝牡騰蛇  
不交不可謂貞今孔雀以影相接而孕又雌見雄舞而  
有子皆物性自然也陰陽自然變化論曰螭蛇聽而有  
孕白鷺視而有胎

蛇

魚屬連行蛇屬紆行詩曰委蛇蓋取諸此左傳曰退食自公委蛇委蛇謂從者也衡而委蛇必折故序以言正直洪範三德一曰正直中德也其行委蛇是以其德在剛柔之中大史曰大直若屈道固委蛇有是哉此之謂也舊說蛇盤常向壬地壬北方也周官曰龜蛇為旒先儒以為龜蛇象其捍難避害龜甲者也而蛇擊前則尾應擊後則首應自腰擊之則首尾俱應有兵之象故龜

蛇合體謂之玄武易曰一陰一陽之謂道而玄朔者道之所在陰陽之理具焉故物有玄龜鱣蛇臟有左腎右命方有朔有北器有準有繩其為卦也名之曰習坎習猶重也舊說牛以鼻聽蛇以眼聽語曰蛇聾虎聾其以此乎莊子曰蛇憐風風憐目目憐心其言蓋展轉輕妙述異記曰凡珠有龍珠龍所吐也蛇珠蛇所吐也語曰蛇珠千枚不如一玫瑰言蛇珠賤也變化序曰鵠之為猿蛇之為鼈一曰麋鹿易蹄蛇類易皮鼈類易殼稽聖

賦曰蛇曉方藥鳩善禁呪蓋鳩能禁呪大石使起取蛇食之其禁石時舉翅行前却如道士禹步則石起也按十二子辰為龍巳為蛇巳六陽具不為龍而為蛇者龍至此而亢故也宜為蛇而已故曰亢之為言也知進而不知退知存而不知亡知得而不知喪

虺

虺狀似蛇而小銘曰為虺弗摧為蛇奈何以此故也正月之詩曰哀今之人胡為虺蜴虺一名蝮博三寸首大



如擘舊說蝮蛇怒時毒在頭尾螫手則斷手螫足則斷足蛇之尤毒烈者也一曰蝮與虺異虺如土色所在有之蝮蛇鼻反其上有針錦文衆蛇之中此獨胎產生輒圻副母腹亦有與地同色者段氏云凡禽獸必藏形匿影同於物類是以蛇色逐地茅兔必赤鷹色隨木字說曰蛇螫人也而亦逃人也是為有它蝮觸之則復其害人也人亦復焉舊云鴆食此類鳥似鷹而紫黑喙長七八寸作銅色食蛇蛇入口即爛屎溺著石石亦為之爛

其轉巨石作法亦如鶴鳥禹步然羽翮有毒以櫟酒飲之殺人惟犀角可以解故有鴆處必有犀也

蚺蛇

大蛇可食尾圓無鱗身有斑文如故暗錦顯難死似鼉行地常俯其首膽隨日轉上旬近頭中旬在心下旬近尾南人云俗取其膽以充藥材即以線合其瘡縱之後遇捕者輒自見金瘡以明無膽亦其知也南越志曰蚺蛇牙有長五六寸者土人重之云辟邪利遠行也一云

蚺蛇之膽取而還生又云巴蛇吞象蚺蛇吞鹿

螂蛆

爾雅曰疾藜螂蛆廣雅曰螂蛆蜈蚣性能制蛇卒見大蛇便緣而啖其腦莊子曰螂蛆甘帶是也今俗謂之百足魯連子曰百足之蟲三斷不蹶則其所持者衆也故曰諸侯有爭臣五人雖無道不失其國一名蚘方言曰馬蚘北燕謂之蛆蝶其大者謂之馬陸莊子曰夔憐蚘蚘憐蛇言夔以少而羨多蚘以有而羨無此非造極之

言蓋蛇無足亦足夔一足亦足蛇百足亦足豈容歆羨  
於其間哉一名商距莊子曰使蚤負山商距馳河三教  
珠英曰蜈蚣見蛇能以氣禁之蓋土勝水故螂蛆搏蛇  
舊說蟾蜍食螂蛆螂蛆食蛇蛇食蟾蜍三物相值莫敢  
先動是亦騎虎之義不得下也

螢

夜飛腹下有火故字从熒省熒小火也月令季夏曰腐  
草為螢不言化者不復為腐草也後世屠者饜於藜藿

而市扇者常苦暍傳曰螢戴火而寒有是哉秋陰數雨  
螢火夜飛之時一名挾火一名據火一名熠燿詩曰熠  
燿宵行今西北多螢大者如棗行而有光正曰宵行以  
此故也毛詩傳曰熠燿燐也燐螢火也先儒以為老槐  
生火久血為燐燐非螢火誤矣蓋燐者火之微名故此  
兩者通謂之燐爾雅曰螢火即熠燐也古今注亦以為  
螢食蚊蚋一名夜光一名宵燭一名燐然則燐亦螢火  
明矣崇有論曰鳥無胃而生螢無胃而育一說螢非熠

燿熠燿行蟲爾今卑濕處有蟲如蠶蠋尾後載火行而有光俗謂之熠燿

蟋蟀

陰陽率萬物以出入至於悉蛰帥之為悉蟋蛰能帥陰陽之悉者也似蝗而小善跳正黑有光澤如漆一名蒼一名促織語曰促織鳴懶婦驚膏奢而苟唐儉以勤故詩一以蟋蟀一以蟋蟀刺之詩曰蟋蟀在堂歲聿其莫蟋蟀在堂九月之時也九月建戌於文未干為年步戌

為歲蓋年取禾之一熟而歲騎兩稔故步成至戌謂之  
歲也一章曰職思其居言於行思其居也二章曰職思  
其外言於內思其外也三章曰職思其憂言於樂思其  
憂也詩序所謂憂深思遠有堯之遺風者此也詩曰十  
月蟋蟀入我牀下言蟋蟀微物也猶知隨時可以人而  
不如乎故曰物有微而志信人有賤而言忠也傳曰蟋  
蟀之蟲隨陰迎陽一名吟螿秋初生得寒乃鳴詩義問  
曰蟋蟀食蠅而化

蝓蛻

蝓蛻一名蛻娘爾雅所謂蝓蛻蛻娘是也衝波傳曰蝓  
蛻無鼻而聞香黑甲翅在甲下五六月之間經營穢場  
之下車走糞丸一前挽之一後推之若僕人轉車久之  
輒羽化如尸解仙去也莊子曰蝓蛻之知在於轉丸夫  
以蜘蛛蝓蛻之知而猶能布網轉丸則萬物付之自然  
各有能矣此列莊之徒所以欲擺工倖之指也淮南子  
曰周鼎著倖使銜其指以明大巧之不可為正為是爾



抱朴子曰玄蟬絜飢不羨蜨螿穢飽故回之簞瓢有以輕猗頓之富也古今注曰一名弄丸

阜螽

今謂之螬蛄示跳示飛飛不能遠青色爾雅曰阜螽蟻草蟲草蟲負蟻蓋草蟲鳴阜螽躍而從之故阜螽曰蟻草蟲謂之負蟻也詩曰嚶嚶草蟲趯趯阜螽言大夫妻求而往疾於聽從如此杕杜之詩亦云者蓋言赫赫南仲薄伐西戎故從役之大夫婚姻得以及時如召南之世也

夫豈特大夫而已蓋其下者歸亦以時得及婚姻祭祀  
耕蠶之事故曰春日遲遲卉木萋萋倉庚啾啾采蘋祁  
祁赫赫南仲玃玃于夷也一曰蚯蚓即負螽也亦以離  
應草蟲鳴于上風負螽鳴於下風而風化博物志云螺  
羸亦取阜螽子呪而成已子

### 蝻螯

爾雅曰蝻螯蝻螯蝻螯蝻螯蓋蝻螯一名蝻螯一名蝻螯本  
草亦曰一名蝻螯舊說蝻螯生於木中內外絮白符子

所謂石生金木生蝎是也蝨蟻在畫草中外黃內黑亦  
或謂之蟻蟻列子所謂烏足之根為蟻蟻是也蟻蟻大  
者如足大指以背行乃駛於脚造化權輿云蛇豸腹窟  
蟻蟻背行今俗謂之蝨蟻方言曰蝨蟻謂之蝨自關而  
東謂之蝨蟻舊云蟻蟻化為復育復育轉而為蟬蓋蟬  
之去復育龜之解甲蛇之脫皮可謂尸解矣三教珠英  
曰蒿成蟻蟻

蟻

繭生蛾蛾生卵博物志曰食桑者有緒而蛾蛾類者先  
孕而後交蓋蛹者蠶之所化蛾者蛹之所化荀子曰蛹  
以為母蛾以為父是也蛹一名蠅蛾一名羅孫炎爾雅  
正義以為蠅即是雄蛹即是雌羅即是雄蛾即是雌蛾  
似黃蝶而小其眉句曲如畫故詩以譬莊姜碩人曰螻  
首蛾眉今一種善拂燈火夜飛謂之飛蛾一名慕光符  
子曰不安其昧而樂其明是猶文蛾去暗赴燈而死亦  
其類也與廬而為牝牡廬一名過街言逢申日則過街

殆與鷓忌庚申燕避戊己無異周人設官覆天鳥之巢  
以方書十日之號十有二辰之號十有二月之號十有  
二歲之號二十有八星之號縣其巢上則去之言天鳥  
見此五者而去良有以也變化論曰蝙蝠夜值庚申乃  
伏

蠶

爾雅曰國貉蟲蠶郭璞云今呼蛹蟲為蠶廣雅曰土蛹  
蠶蟲也蠶蓋蟲之知聲者也字从響省或曰蠶善令人

不迷故从嚮也類從云帶蠻醒迷遶祠解惑是也說文亦云司馬說蠻从向舊說蠅於蠶身乳子既繭化而成蛆俗呼蠻子入土為蠅韓詩外傳曰齒如編蠻非此所謂蠻蟲也

### 蝶

蛺蝶粉翅有鬚一名胡蝶列子曰烏足之根為蟻螬其葉為胡蝶胡蝶昏也嘗見園蔬其葉有為蝶者三分二已蝶矣其一尚葉也干寶云稻成螿麥成蛺蝶豈虛語

哉續古今注曰龜鼈之類無雄蜂蝶之類無雌一說蜂蝶醜皆以鬚嗅鬚蓋其鼻也杜甫詩曰花藥上蜂鬚以此今絡緯螿蟻之類亦以其鬚當鼻爾

莎雞

小蟲黑身赤首一名莎雞一名樗雞一名天雞爾雅曰翰天雞蓋其鳴以時故有雞之號詩曰六月莎雞振羽言於是時莎雞羽成而振迅之也爾雅曰螽醜奮草木疏云如蝗斑色毛翅數重其翅正赤六月中飛而振羽

索索作聲幽州人謂之蒲錯古今注曰莎雞一名絡緯  
謂其鳴如紡緯也促織一名投機謂其聲如急織也俗  
云絡緯雄鳴於上風雌鳴於下風而風化



埤雅卷十

埤雅卷十音釋

蝻蟻

蟪蕭

蛸所交

蠋蜀

虺乎鬼

蚶然

蛄起吉

蟻扶非

蠶許兩

室知乙

蚶巨俱

躄記

條條

蚶狂克

蠶市行

蠶丑介

莽平

螫式

蠶弋木

閔胡絳

蠶蝨

蛾胡國

蛻稅

龜烏貢

蜴亦

蝮福

翮諧革

標歷

縑韻

蹶厥

燐力刃

蛭所蜜

蝥拱

蜉浮

聿律

擺歷

倅是推

蝻

蝻從

阜阜

螯樊

噎遙

趯剔

杖第

獫顯

狃允

駛史去聲

贗資

蛹勇


蛄衛

廡之夜

鷗福

樗丑於

翰汗



欽定四庫全書

經部  
埤雅卷十一至  
三

詳校官國子監祭酒臣覺羅書善

洗馬臣王坦修覆勘

總校官庶吉士臣何思鈞

校對官中書臣陸 湘

謄錄監生臣沈希曾

欽定四庫全書

埤雅卷十一

宋陸佃撰

釋蟲

蠶

蜘蛛

蚋蠖

螳螂

蜉蝣

蝓蟻

蠛蠓

螟

蟪

寒蛸

蟪蛄

蛾

蚱蜢

蚯蚓

果蠃

螻蛄

蜻蛉

蚊

鼠

易

蠶

蠶陽物也惡水食而不飲淮南子曰蠶食而不飲蟬飲而不食蜉蝣不食不飲再蠶謂之原蠶一名魏蠶今以晚葉養之先王之法禁馬淮南子曰原蠶再登非不利也然王者之法禁之為其殘桑也鄭云蠶為龍精月直大火則浴其種是蠶與馬同氣物莫能兩大禁原蠶者為害馬歟然則原蠶有禁非特欲以護桑又以害馬故也今蠶負馬迹亦其驗歟里俗謂之夏蠶亦曰熱蠶亦

曰晚蠶自世衰道微先王之禁不行而民間一歲至有三蠶者矣是以桑弱而馬耗也蠶書曰飼蠶勿用雨露濕葉蓋蠶性惡濕故禮云桑于公桑風戾以食之也今俗飼蠶以葉洒之欲其勻厚故古者王親耕三推而止王后親蠶三洒而止舊云蠶之所吐為忽十忽為絲五絲為緝十絲為升二十絲為絨四十絲為紀八十絲為總詩曰素絲五絨又曰五總其絲之數蓋如此太玄曰紅蠶綠于枯桑其繭不黃蓋蠶足於葉三俯三起二十

七日而蠶已老則紅故謂之紅蠶紅蠶以繭白衣亦或謂之室易林曰飢蠶作室是也爾雅釋蟲曰蠨桑繭雒由桴繭棘繭藥繭虻蕭繭

蜘蛛

論衡曰蜘蛛結絲以網飛蟲人之用計安能過之亦掃其網置衣領中令人知巧辟忘世云蜘蛛布網如罽其絲右繞左磨旋蔓生皆循右而轉亦自然之理也易曰作結繩而為網罟以佃以漁蓋取諸離重門擊柝以待



暴客蓋取諸豫說者又以謂放蜘蛛而結網法螺蚌而閉戶則古之知者創物其兼取博矣蓋昔者聖人之作易也既曰仰觀於天俯察於地而又觀鳥獸之文與地之宜則所謂取才於物雖非所以先者然亦豈可少哉字說曰設一面之網物觸而後誅之知誅義者也

蜈蚣

蜈蚣屈伸蟲也一名蚘蚘又呼步屈方言曰蚘蚘謂之蜈蚣賦曰龍伸蜈蚣屈蓋將以求伸也易曰尺蠖之

屈以求信也言以屈道致伸漢志曰尺者隻也蠖之義蓋取諸尺蚓之義蓋取諸引引者伸也隻於尺伸於引今人布指求尺一縮一伸如蠖之步謂之尺蠖豈放是乎亢桑子曰夫俗隨國政之方圓猶蚘蠖之於葉也食黃則身黃食蒼則身蒼蚘蠖似蠶食葉老亦吐絲作室舊說蚘蠖之繭化而為蝶此猶蛹之變蛾爾賦曰蠖螟飛而生風蚘蠖動而成響言屋之空曠深靜易以生風答響如此詩曰噲噲其正噦噦其冥是也

螳螂

螳螂有斧蟲也。堯人謂之拒斧，其臂如斧，奮之當轍，不避。莊子所謂猶螳螂之怒臂以當車轍者也。一名不過。以此爾雅曰：不過，螳螂。其子蜉蝣捕蟬而食，執木葉以自蔽。蟬將去而未飛，為之一前一却。莊子曰：螳螂執翳而搏之，見得而忘其形，蓋謂是也。世云螳螂所執之翳，可以蔽形，類從曰螳螂之氣，含之生火，蚯蚓之塵，背洒起霧，未知其審。月令曰：螳螂生，蓋是月升陰，始起殺蟲。

應而生焉孫炎爾雅正義云螿娘深秋乳子至夏之初  
迺生是也亦生百子如蝨斯云

蜉蝣

蟲似天牛而小有甲角長三四寸黃黑色甲下有翅能  
飛燒而噉之美於蟬也翕然生覆水上尋死隨流梁宋  
之間曰渠略叢生鬱棲中朝生暮殞有浮游之義故曰  
蜉蝣也詩曰蜉蝣掘閱麻衣如雪如雪以刺其奢而掘  
閱言掘土使解閱也管子曰掘閱得玉蓋言羔裘如膏

則其好絮可知矣麻衣如雪則其好奢可知矣子曰麻冕禮也今也純儉夏小正云蜉蝣有殷殷衆也蜉蝣殷之時也言有有見也

蝻蟻

爾雅曰蝻蝻蝻又曰蝻蟻蝻蓋蝻一名蝻蟻一名蝻蝻  
佶屈曲貌以形舉也方言曰關東謂之蝻蟻梁益之間  
謂之蝻詩曰領如蝻蟻蓋蝻蟻之體有豐絮且白者故  
詩以況莊姜之領七辯曰蝻蟻之領阿那宜顧是也化

書曰燥濕相育不母而生蝨蟻此即木中蠹蟲亦曰桑蠹故古者譜從中起謂之蝨譜曹植籍田論曰昔三苗共工謹兜非堯之蝨歟齊之諸田晉之六卿魯之三桓非諸侯之蝨歟

蠹

小蟲似蝨亂飛者也一名醯雞列子曰醯雞生乎酒又曰食醯頤輅生乎食醯黃軌食醯頤輅即蠹是也孔子曰入之於道也其猶醯雞與微夫子之發吾覆也吾不

知天地之大全制字从蒙音謂之懵以此爾雅曰蠖蠖  
蠖孫炎注云蠖蠖此蟲微細羣飛郭璞亦曰蠖飛磴則  
天風春則天雨此言蠖蠖將風則旋飛如磴一上一下  
如春則雨矣然其圖贊又曰風春雨磴二說不同也

螟

食心曰螟食葉曰蠶食節曰賊食根曰蝨爾雅所謂食  
苗心螟食葉蠶食節賊食根蝨許慎說文以為吏冥冥  
犯法即生螟乞貸則生蠶抵冒取民財則生蝨然則靈

芝朱草秬秠之鍾其美與螟蟻之鍾其惡雖不同其繫王者之政一也淮南子曰枉法令即多蟲螟其以此乎蟻則蝗也蝗字从皇今其首腹皆有王字未燭厥理也或曰蝗即魚卵所化列子曰魚卵之為蟲蓋謂是也俗云春魚遺子如粟埋於泥中明年水及故岸則皆化而為魚如遇旱乾水縮不及故岸則其子久閣為日所暴乃生飛蝗故詩曰衆維魚矣實維豐年說者以為陰陽和則魚衆多矣故豐年夢魚理或然也詩曰去其螟螣



及其蟲賊無害我田穉苗而未秀為穉韓詩曰穉幼稼也蓋蟲賊螟蟻尤為穉禾之害字說云蟻食苗葉無傷於實若蟻可貸也賊食苗節賊苗蟲食根如句所植螟食心不可見

### 塘

塘一名蠓其首方廣有冠夏小正曰娘蜩者五采具塘蜩者蠓是也俗呼胡蟬似蟬而小鳴聲清亮者江南謂之塘蜩詩曰如蜩如塘如沸如羹言天下謹譁沸騰不

安如此此序所謂無網紀文章者也又曰菀彼柳斯鳴  
蜩嘒嘒言蜩與柳異類今蜩託蔭其上鳴聲嘒嘒則王  
之於已不如菀柳之餘亦茫其蜩也鄒陽柳賦以為蜩  
蟪厲響蜘蛛吐絲蓋蟬得美蔭則其鳴聲尤清厲方言  
曰楚謂之蜩宋衛之間謂之蟪蜩陳鄭之間謂之蜋蜩  
按詩云如蜩如蟪則蜩與蟪異實非一物蓋蜩亦蟬之  
一種形大而黑昔人啖之禮有雀鷄蜩范是也一名蟬  
為其變蛻而禪故曰蟬亦其通名蟬舍卑穢趨高潔其

禪足道也鹽鐵論曰以所不覩而不信若蟬不知雪也  
又況道常無所而不可覩者乎是故聞而不笑者寡矣  
故曰道無問無問之是責空也舊說朽木化為蟬壞  
裙化為蝶腐菌化為蜂又曰蠶二十日而化蟬三十日  
而化

寒蜩

寒蜩似蟬而小青赤一名蜺一名寒蟬蔡邕月令云鳴  
則天涼故謂之寒蟬其生坼裂母背故釋蟲云翦醜螻

蓋蟬善飛翥故謂之翥醜論衡曰蟬生於復育開背而出方言曰黑而赤者謂之蜺又曰螻謂之寒蜩寒蜩瘖蜩郭氏云按爾雅以蜺為寒蜩月令亦曰寒蟬鳴則知寒蜩非瘖者也寒蜩即今啞蟬啞蟬初瘖及得寒露冷風乃鳴故芻蕘論云秋風至而寒蟬吟正謂此也然則方言原其始故謂之瘖蟬今雌蟬亦啞陶隱居所謂啞蟬雌蟬也不能鳴者然與寒蜩初瘖又異矣又一種似蟬而小綠色北人謂之螻頰廣且深即詩所謂螻首蛾

眉是也

蟋蟀

廣雅云蟋蟀螿蛸莊子曰朝菌不知晦朔蟋蟀不知春秋蟋蟀夏蟬也是故不知春秋按離騷曰蟋蟀鳴兮啾啾歲暮兮不自聊則蟋蟀亦秋蟬矣一曰春生者死於夏夏生者死於秋故曰不知春秋也方言曰齊謂之蟋蟀楚謂之蟋蟀釋蟲云蟋蟀蟋蟀即此是也莊子音義以為此即楚辭所謂寒蟬者也按風土記曰蟋蟀鳴於

朝寒蟹鳴於夕則寒蟹螭蛄又為兩物孔子曰違山十里螭蛄之聲猶在於耳故政事莫如應之言政事惡謹而善肅以靜應之而已稽聖賦曰躋螭行以其背螭蛄鳴非其口按山海經有獸以其尾飛有鳥以其鬚飛則覆載之間負類反倫何所不有可勝言哉

蛾

蛾短狐也似鼈三足含水射人一日含沙射人之影其瘡如疥稽聖賦所謂蛛旋於影蛾射於光是也一名射

工一名溪毒有長角橫在口前如弩檐臨其角端曲如上弩以氣為矢因水勢以射人故俗呼水弩春秋曰秋有蜮即此是也然畏鵝鵝能食之禽經所謂鵝飛則蜮沉鴟鳴則蛇結詩曰為鬼為蜮則不可得言鬼無形而蜮性陰害射人之影則皆莫可究矣五行傳曰南越淫惑之氣生蜮蜮之猶言惑也字說曰蜮不可得也故或之今蜮蝮溺人之影亦是類爾造化權輿曰短狐射氣蜮蝮遺溺中影則疾人氣數感之故也周官曰凡隙屋

除其狸蟲狸蟲蝨蛛之屬蛛蝨言搜而去之也亦言求而去之也

蚰蟻

詩曰伊威在室伊威甕器底蟲形似白魚而大爾雅曰伊威委黍一名鼠婦食之令人善淫術曰鼠婦淫婦是也亦曰鼠負陶隱居云鼠在坎中背則負之今作鼠婦如似乖理誤矣蓋鼠婦一名鼠姑亦或謂之鼠粘鼠婦猶鼠姑也鼠粘猶鼠負也因溼化生今俗謂之溼生



蚯蚓

考工記注云却行蝻屬蚓土精也其為物不息引而後伸蛄善緣蚓善引蛤介合鱗介解蚓或从寅志曰引達於寅一名蛻蟪一名曲蟪一名土龍善長吟於地中江東謂之歌女亦曰鳴砌孟子曰若仲子者蚓而後充其操者也言若仲子之操則蚓而後可不可以入仁義之域月令云蚯蚓結言蚯蚓穴居首陽下嚮陽動則穴而上首故其身結而屈也傳曰魚無耳蟬無口蛇無足蚓

無筋舊說蚯蚓土精無心之蟲與蜚蠊交有一種白項是其老者也

果羸

即今細腰土蠶好禁蜘蛛說文云天地之性細腰純雄無子列子曰純雄其名穉蜂蓋其類也槌泥作房如併竹管取桑蟲負之七日而化為子其祝聲可聽法言曰祝之曰類我蓋其音云也莊子曰細要者化今呼大蠶啖子地中作房者亦曰土蠶非此細腰土蠶也果羸一

名螻蛄一名蒲盧中庸曰政也者蒲盧也化書曰嬰兒似乳母斯不遠矣

螻蛄

螻蛄臭蟲一名螿一名天螻夏小正曰螿則鳴螿天螻也孫炎爾雅正義以為螿是雄者喜鳴善飛雌者腹大羽小不能飛翔食風與土要以前甚澁要以後甚利類從曰磨鐵致蛄汗羈引兔振灰除蠹蛤陽去伏言物之相關感有如此者法言曰狐狸螻蛄不腰臘也與言若

牛羊之用人則螻蛄不腰狐狸不臘矣方言云螻蛄謂之螻蛄周官曰馬黑脊而般臂螻先儒云螻蛄臭也傳所謂腥螻而不可饗膾惡而不可親蓋出於此一曰螻宜讀如螻蟻之螻呂子曰流水不腐戶樞不蠹螻者蟻也醫經以為狐狸螻蟻之餘勿食食之令人生瘻豈近是乎廣志小學篇曰螻蛄會稽謂之蝟蛄

蜻蛉

蜻蛉飲露六足四翼其翅輕薄如蟬晝取蚊蚋食之遇

雨即多好集水上歎飛尾端亭午則亭名之曰蜉以此  
字或作蜉廷亦直也一名蜻蛉方言曰蜻蛉謂之蜉蛉  
淮南又呼蠓蚋亦曰蠓也造化權輿曰水蠶為蠓字說  
云蛉蜻蜉也動正常廷故又謂之蛉今出於廷者也古  
今註曰蜻蛉一曰青亭色青而大者是也賦云塗青蚨  
而還錢理蜻蛉而變珠說者以為五月五日取其首正  
中門埋之皆成青珠故類從曰青蛉之首瘞而為珠也

蚊

說文云蠶人飛蟲从虫民聲亦或从昏以昏時出也俗云蚊有昏市益蠅成市於朝蚊成市於暮傳曰聚蟲成雷謂其市之時也蟲民蟲虫眊蟲田牧者病焉一曰虫盲故謂之虫揚子或問貨殖曰蚊蓋蚊之取利雖小然而善撓令人通夕不寐故雄以此託況說文曰秦晉謂之蚋楚謂之蚊蓋蚋喜亂飛似蚊而小望之如霧荀子所謂醯酸而蚋聚者也因雨而生與蚊實異一名贅芮列子曰贅芮生乎腐蠃蠃即黃甲小蟲一名輿父一名

守瓜爾雅云蠶輿父守瓜鶡冠子曰一蝸嚼膚不寐至  
旦半糠入目四方弗治言物苟為害不必在大蓋亦不  
在多也蚊性惡煙以艾熏之則潰長喙如針善螫

### 鼠

說文曰鼠穴蟲之總名也象形行露之詩一章曰誰謂  
雀無角二章曰誰謂鼠無牙說者以為雀角以無為有  
鼠牙似是而非按雀角鼠牙皆言以無為有似是而非  
也蓋雀有味而無角鼠有齒而無牙傳曰不思物變而

推其類雀之穿屋似有角者又曰視墉之穿推其類可謂鼠有牙明鼠無牙者也夫雀之為物依人又晝動而無角在其首且所穿者屋事之易察也鼠之為物畏人又夜動而無牙在其口且所穿者墉事之難知也召南之初事之易察者至於獄而後明及其久也衰亂之俗已微貞信之教已興則雖事之難知者不待獄而明矣故於雀言獄鼠言訟也鼠一名鼯南陽呼鼠為鼯廣雅曰鼯鼠是也今一種鼠見人則交其前足而拱謂之禮



鼠亦或謂之拱鼠詩曰相鼠有體人而無禮其或取諸  
此乎傳曰窮鼠齧狸蓋鼠窮則鬪也故兵法曰歸師勿  
遏圍師必闕鼯鼠有螫毒者甘口齧人及鳥獸皆不痛  
春秋所書食郊牛之角者也博物志云鼠之最小者或  
云甘鼠是也莊子曰載鼯以車馬樂鵠以鐘鼓鼯小鼠  
也鵠小雀也傳曰稷蜂不熏社鼯不灌蓋其所託有如  
此者鼯鼠兔首似鼠而大能人立交前兩足而舞害稼  
者一名雀鼠廣雅云鼯鼠鼯鼠是也易曰晉如鼯鼠蓋

晉進也順而麗乎大明柔進而上行今九以剛進處四失順而又麗乎陰則拂晉之道矣故曰進如鼫鼠無所守焉貪而畏人又比乎陰九四之象也碩大也詩序所謂貪而畏人若大鼠也且五之所以蕃錫而康四之所以貪竊而懼者亦豈有他哉五以柔進順而麗乎明四以剛進悖而麗乎暗故也鼫鼠健於捕鼠似貂赤黃色大尾今俗謂之鼠狼廣雅曰鼠狼鼫是也一名鼫莊子所謂騏驥騂騮捕鼠不如狸狔今粟鼠似之蒼黑而小

取其毫於尾可以製筆世所謂鼠鬚栗尾者也其鋒乃健於兔栗鼠若今竹鼯之類蓋鼠食竹故曰竹鼯燕山錄曰煮羊以鼯煮鼯以蚊言其性類相感省火易熟有如此者鼯鼠一名鼯鼯一名鼯鼯似鼠而小東方朔曰譬猶鼯鼯之襲狗者也鼯鼠爾雅所謂鼯鼠夷由狀如小狐肉翅翅尾項脅毛皆紫赤色脚短爪長飛且乳者亦或謂之飛生或曰一名飛蠅其狀如兔而鼠首以其鬚飛性食火煙能從高赴下不能從下升高禽經曰鷓

鳥不登山鷓鴣鳥不踏土鷓鴣鳥不能從下上高然則鷓鴣之制字从高鷓之从夷其義可知也荀子曰鼯鼠五技而窮即此是也馬融曰猿雖晝吟鼯鼠夜叫舊說鼠性疑出穴多不果故持兩端謂之首鼠韓子曰狐鼠進退又鼠類最壽俗謂之老鼠是也若老鸛老鷓老鳥之類以老稱亦如此爾雅曰東方有比目魚焉不比不行其名謂之鰈南方有比翼鳥焉不比不飛其名謂之鷓鷓西方有比肩獸焉與邛邛岨虛比為邛邛岨虛齧甘草即

有難叩叩距虛負而走其名謂之蟹北方有比肩民焉  
迭食而迭望中有积首蛇焉此四方中國之異氣也按  
蟹鼠前而兔後趨則頓走則顛今契丹北境有跳兔前  
足纔寸許後足幾一尺行則用足跳一躍數尺止則蹶  
然仆地即所謂蟹又有鳥鼠同穴者與鳥為雌雄似鼠  
而短尾鼠在內鳥在外杜甫詩曰水落魚龍夜山空鳥  
鼠秋魚龍水名鳥鼠山名亦鳥鼠秋而魚龍夜是詩兩  
句而含三事也

易

說文曰蜥易蝮蜥守宮也象形博物志云以朱飼之其體盡赤禱之萬杵以點女人終身不滅如赤誌偶則落故曰守宮也周易之義疑出於此取其陰陽構合而易一曰蜥易日十二時變色故曰易也舊說蜥易嘔電蓋龍善變蜥易善易故乾以龍況爻其書謂之易爻者言乎其變也象之義出於象彖之義出於彖易之義出於易皆取諸物也周官太卜掌三易之法夏曰連山殷曰

歸藏周曰周易連山始於艮故曰連山易曰兼山艮是也先儒以為象雲氣之出於山連連不絕非是歸藏始於坤故曰歸藏周易始於乾故曰周易乾始萬物坤終萬物艮者終始萬物故三代之易各首一焉易曰終萬物始萬物者莫盛乎艮蜥易一名蛇醫字林所謂蝮蛇醫是也舊說蛇體有傷此輒銜草傳之故有醫之號也東方朔曰是非守宮則蜥蜴如此守宮乃蝮蛇也今俗謂之蝮虎喜緣籬壁者是按爾雅云蝮蝮易蜥易

蝮蜥蝮蜥守宮本草亦曰一名蜥蜴一名守宮則蝮蜥  
蜥蜴蝮蜥守宮異名而通者也方言曰守宮秦晉西夏  
謂之守宮或謂之蠧蠧或謂之刺易其在澤中者謂之  
易蜥南楚謂之蛇醫或謂之蝮蝮東齊海岱之間謂之  
蝮蝮北燕謂之祝蜥考工記注云脰鳴鼃鼃屬注鳴精  
列屬旁鳴蝮蝮屬翼鳴發皇屬股鳴蝮蝮屬曾鳴榮蝮  
屬馬融周官作以胃鳴干寶周官作以骨鳴說者以為  
三字相近雖容有誤而馬鄭與干皆前世名儒或所授



師說不同按說文螭大龜也以胃鳴者則馬本作以胃  
鳴當謂螭屬三教珠英云守宮鱗色如蛇而四足亦與

魚合

埤雅卷十一

埤雅卷十一音釋

羸 裸

飼 似

緝 搦

螻 象

虻 虻

蚘 子六

隻 獲

噲 火

噉 火外

蚍 蚍

噉 啖

蟻 已結

蟻 得

蟲 謀

羸 瘡

巨 巨

苑 苑

噉 許惠

菌 窟

罅 罅

應 於凝

頤 頤

蟻 胡雞

蟻 力木

蚍 木

蝮 求

檐 言

蝮 以朱

溼 濕

蝮 引

蝮 斛

膜 力侯

螻 知栗

瘻 漏

蝮 流

虫 昆

田 亡 莫 翹

替 木

蠶 巨 表

嚼 錯 感

離 非

離 下 難

龜 市 亦

鮑 之 勺

悖 單

馳 右

馳 所 敬

龜 留

鮑 幼

龜 子 盈

縱 即 容

龜 舌

蝟 雷

鵝 帝

鷓 鶴

雌 余 救

鰈 宅 臘

鷓 兼

巨 其 呂

蠃 偃

蝶 榮

蛭 原

盧 墟

蠃 直 連

虺 虎

蝮 法

龜 蛙

澗 猛

此 松

蝟 脊

蝮 規

欽定四庫全書

埤雅卷十二

宋陸佃撰

釋馬

馬

羈

騏

鼻

駱

白顛

驥

駮

黃

駒

駟

駮

駮

駒

駮

馬

說文云馬怒也武也象馬頭髦尾四足之形石建曰書馬者與尾而五今四不具是也然則緯書以為王者駕馬故字以王為馬誤矣且王無駕馬之制蓋古者天子乘龍諸侯乘馬故易以龍叙乾以馬明坤而天子乘龍駕六諸侯乘馬駕四白虎通曰天子駕六者示有事於天地四方也漢書曰乾文車坤六馬列子亦云六轡不亂而二十四蹄所投無差則古有駕六之制者矣故書曰懷乎若朽索之馭六馬今文以竹策龍為籠以竹策

馬為篤蓋良馬見鞭影而行則鞭策之於龍是以籠之  
非以篤之也列子曰聖人以知籠羣愚蓋籠之道如此  
舊說相馬肝欲得小耳小則肝小肺欲得大鼻大則肺  
大脾欲得小賺小則脾小心欲得大目大則心大又曰  
眼欲得有紫豔口欲得有紅光上脣欲得緩下脣欲得  
急上齒欲鈎鈎則壽下齒欲鋸鋸則怒脊欲大而抗頷  
欲方而平喉欲曲而深胃欲直而出兔間欲開虎口欲  
開升肉欲大而明輔肉欲大而明耳欲如劈竹睛欲如

懸鈴頭欲高如剝兔項欲起如飛龍又曰人眼鳥目麋背麟腹虎胷龜尾擎頭如鷹垂尾如彗又曰望之大就之小筋馬也望之小就之大肉馬也前視見目旁視見腹後視見足駿馬也毛束皮皮束筋筋束肉肉束骨五者兼備天下之馬也又曰口中紅白間色者壽鼻中紅色如朱點書者壽眼中赤色如字形者壽易曰賁如皤如白馬翰如言未受飾於物也詩曰皎皎白駒賁然來思賁然來思則言受飾於物矣受飾於物則與在彼空



谷生芻一束者異矣故戒之以愛日毋為優游於此勉之以適思也曲禮曰立視五篙式視馬尾小俛為式蓋立視視車之衡則平視馬之尾則俯矣故平視或謂之衡視鄭云篙謂輪轉之度蓋當謂其徑也言乘車之輪六尺有六寸五六三十積尺為三丈積寸為三尺則五篙之袤三丈三尺荀子曰立視前六尺而大之六六三十六三丈六尺即此是也又曰坐視膝立視足言坐則視膝立則視足也又曰應對言語視面言應對言語則

無上於面亦不下於帶也曲禮曰天子視不上於袷不下於帶國君綏視大夫衡視士視五步此即言語應對視面高下之度國君綏視大夫衡視相備也綏視則言俯不下於帶衡視則言仰不上於面蓋國馬之衡高八尺有七寸田馬之衡高七尺有七寸駑馬之衡高六尺有七寸以中言之衡高七尺七寸人長七尺則高與人目略平故曰前有錯衡所以養目也又曰執天子之器則上衡上衡謂齊首矣國君則平衡平衡謂齊眉矣大

夫則綏之謂當心矣士則提之謂當帶矣禮曰提者當帶而國君綏視不下於帶則綏之當心提之當帶明矣或曰凡物有當提者有當捧者今以貴賤之等而令當提者捧當捧者提可乎曰是禮也非是之謂也蓋曰執天子之器上衡國君平衡則正為執器者言之而已非謂當提之器使捧當捧之器使提也荀子又曰平衡曰拜下衡曰稽首至地曰稽顙蓋亦準車之衡言之朝野僉載曰伯樂令其子執馬經以求馬經年無有似者歸

以告父更令求之出見大蝦蟆謂其父曰得一馬略與相同而不能具伯樂曰何也對曰其馬隆顙跌目但蹄不如累麴爾伯樂笑曰此馬好跳擲不堪御也括母曰括徒能讀其父書不知合變亦近之爾

騶

今之烏騶也爾雅曰騶白雜毛騶蓋取諸騶也今騶其色驪白詩曰乘乘馬乘乘黃乘乘騶六尺已上為馬黃色純色騶雜色古者大夫乘駒乘馬則僭諸侯之禮矣蓋

亂生於衣服車馬之間而已大叔于田乘乘馬而沃之  
大夫素衣朱襮此晉鄭之所由亂也騅亦馮類取騅之  
色一曰蒼白雜毛騅一曰蒼黑雜毛騅今騅色在青黑  
之間亦在青白之間詩曰毳衣如蒺傳曰蒺騅也然則  
色在青白之間

騅

毛詩傳曰青黑曰騅蓋騅蒼艾色一曰馬青驪文如博  
碁也詩曰其帶伊絲其弁伊騅弁皮弁也司服曰凡兵

事韋弁服。眡朝則皮弁服。韋弁以韎韋為之。故曰韋弁。一名爵弁。其色則象爵。故也。皮弁以鹿皮為之。故曰皮弁。一名騏弁。其文則象騏。故也。亦或謂之綦弁。鄭氏以為爵弁似冕。又謂韋弁韎韋為弁。又以為其衣裳。又曰韋弁蓋韎布為衣。而素裳皆誤矣。按士冠禮。爵弁服纁裳。純衣。緇帶。韎韐。則韋弁服純衣纁裳矣。凡弁爵弁為上。皮弁次之。故司服。初一日韋弁服。次二曰皮弁服。次三曰冠弁服。次四曰服弁服。次五曰弁絰服。蓋冠弁服。

弁皮弁服也弁經則服皮弁而加經故其序如此喪服  
小記曰諸侯弔必皮弁錫衰服問曰公為卿大夫錫衰  
當事則弁經足相參證也左傳曰衛獻公戒孫文子甯  
惠子食而射鴻於圃二子從之不釋皮冠而與之言皮  
冠弁也說者以為田獵之冠則凡甸事冠弁服即皮弁  
又明矣詩曰騏駼是中駟驪是騃蓋騏駼中駟駟驪上  
駟故服以騏駼騃以駟驪淮南子曰騃欲馳服欲步宣  
王之詩北伐舉四驪南征舉四騏者言方是時馬政愈

修其所以執駒綱馬教駢攻特臧僕講馭夫之法滋廣  
故雖駢亦閒習任為用矣非獨四驪也

鼻

爾雅曰後右足白驥左白鼻易曰震為鼻足蓋取其躁  
以躁故二絆其足作足言縱之而動也鼻足言制之而  
動也今字鼻从馬一絆其足鼻从馬二絆其足鼻从馬  
口其足詩曰繫之維之口者維之也淮南子曰是猶兩  
絆駢驥而求其致千里也兩絆言鼻其足詩曰駕我駢



鼻王肅謂駕兩馬者下云騏驕是中駟驪是駟騶是駟騶明此駕  
兩者也蓋古者庶人駕一士駕二大夫駕三諸侯駕四  
天子駕六說文曰駟駕二馬也尚書大傳曰命於其君  
然後得乘駟馬駟駕三馬也駟駕四馬也詩曰載駟載  
駟駟以言大夫駟以言諸侯馬政論曰後足偏白者凶  
若鼻之類是也此士之所以駕也歟

駟

爾雅曰白馬黑鬣駟廣雅曰白馬朱鬣駟今呼黃馬尾

鬣一道通黑如界者為駱蓋馬無分於黃白皆謂之駱  
若今夜脊絡縫故曰駱也明堂位曰夏后氏駱馬黑鬣  
此以別白馬朱鬣之駱也月令曰孟秋駕白駱此以別  
黃馬黑鬣之駱也俗云駱馬善奈勞苦詩曰嘽嘽駱馬  
言駱性善勞而今取息不平如此則以甚勞故也古者  
天子之卿純駟故詩曰駕彼四駱又曰乘其四駱若諸  
侯之卿則不能具純駟矣詩曰駕我騏驎蓋言秦之士  
也又曰騏驎是中駟驪是駜蓋言秦之卿也

# 白顛

爾雅曰的顛白顛今之戴星馬也詩曰有車鄰鄰有馬  
白顛鄰鄰衆比貌於車言其衆於馬言其特相備也覲  
禮曰奉束帛匹馬卓上九馬隨之說者以為卓即的顛  
故以為上列而九馬隨其後莊子曰齊之以月題蓋月  
題額上當顛如月者所以象顛之白然則馬之貴的顛  
也可知矣易曰其於馬也為的顛蓋震二陰在上故為  
的顛夫文入二為白白陰色也二陰數也馬政論曰顛

有白毛謂之的盧又曰準上有旋毛及白毛者謂之的  
吻凶俗云的顛非也

驥

說文曰馬深黑色驪馬赤黑色驥先儒云取其馬色如  
鐵非特有取於色蓋亦取其堅壯如鐵故曰驥也月令  
孟冬乘鐵驪即此是也詩曰駟驥孔阜六轡在手以美  
襄公田狩之事蓋馬之族不一而駢馬則喜前駕馬則  
喜後故古之御者駕馬以鞭為主駢馬以轡為主驥性

堅驛則疑於難御而有繁手之勞矣今其六轡在手而已則是無事於轡故詩以美之也陸子曰三皇垂策五帝繁手唐虞按轡禹湯馳轅

駮

驪馬白跨駮駮馬白腹駮駮从縵省禮曰練而縵縵淺赤也一染謂之縵再染謂之縵三染謂之練周人尚赤戎事乘駮赤馬白腹曰駮言上周下殷也詩曰駮駮彭彭此言尚父之乘然則戎事乘駮蓋特其長而已或曰

方叔率止乘其四騏則於戎事乘驪之說害矣曰序詩者曰宣王南征則蠻荆之事正之而已故言兵則非伐人之兵也言車則非戎車也言馬則非戎馬也

黃

黃駢曰黃黃亦馬之上色故駟頌首章曰有驪有黃也列子曰牝而黃牡而驪馬至果天下之馬也有駟曰乘黃矣然後乃言乘牡卒言青驪之駒則黃牝驪牡剛柔之質具矣明堂位曰周人黃馬蕃鬣言吉事乘此詩曰

四黃既駕兩駮不猗是也至於戎事則乘駮檀弓曰周人尚赤戎事乘駮或曰天子之馬盛則駕六常則駕四詩曰四黃既駕兩駮不猗此駕六之證也穆王命八駿之乘右服華駮而左綠耳右駮赤驥而左白灤次車之乘右服渠黃而左踰輪左駮盜驪而右山子此駕四之證也

駮

青驪曰駮今之馘驄也詩曰駮彼乘黃駮彼乘牡駮彼

乘駒言臣有柔順之德剛健之材又被文以成之則臣之道備矣於乘黃曰在公明明於乘牡曰在公飲酒於乘駒曰在公載燕在公明明則禮所謂在明明德也夙夜在公在公明明於是飲酒以載燕則亦以有道故也鹿鳴之道和樂而已非君臣之道也故六月之序至言四牡然後曰君臣缺矣今言在公飲酒在公載燕而更以為頌君臣之有道者蓋夙夜在公在公飲酒則臣有餘敬君有餘惠臣有餘敬君有餘惠則非特若鹿鳴正



言賓主之道而已是乃所以為君臣有道也

駟

爾雅曰黃白雜毛駟陰白雜毛駟駟今之桃花馬駟今之泥驄也詩曰我馬維駒我馬維騏我馬維駱我馬維駟其先後與駟之序合則駟不如駱駱不如騏矣然是詩乃卒言駟者以明馬雖彌劣所以御之滋善

駮

駮白駮徐鉉曰疑象駮文晉侯乘駮乳虎見之而伏則

象駮之文理或然也駮亦馬之上色故古者國君乘之  
文王曰昔者寡人夢見良人黑色而頰乘駮馬而偏朱  
蹄諸大夫蹙然曰先君王也詩曰皇駮其馬亦言皇駮  
者士昏禮攝盛故也爾雅所謂駮如馬倨牙食虎豹詩  
所謂隰有六駮者字从交作字說曰駮類馬食虎而虎  
食馬凡類已也而能除害已者在所交也則駮非此駮  
也

駮

馬善駮牝驪牡爾雅曰駮牝驪牡以罕稱也駮之字從來言進於馬矣宜有來而無往易曰知進而不知退亢龍也凡馬六尺以上為馬七尺以上為駮八尺以上為龍詩曰駮牝三千三千言多駮牝取其大也蓋驎馬常小今俗謂之小馬以此凡馬宗廟用龍戎事用駮田事用駮駮田馬也考工記曰國馬之軻深四尺有七寸田馬之軻深四尺鄭云國馬高八尺衡高八尺有七寸除馬之高則餘七寸為衡頸之間也田馬高七尺衡高七

尺有七寸除馬之高則餘七寸為衡頸之間也校人曰  
邦國六閑馬四種家四閑馬二種大夫曰家其種又自  
田馬而下則所謂國馬者無大夫之馬矣蓋諸侯有良  
馬有戎馬無齊道大夫有田馬有駕馬無種戎或曰正  
言國馬者非特以別大夫亦以約天下之馬也伯樂曰  
良馬可以形容筋骨相也天下之馬若滅若沒若亡若  
失良馬即國馬也故駟頌以為諸侯有良馬有戎馬有  
田馬有駕馬變種曰良者以此也歟廋人曰八尺以上

為龍此種馬也豈所謂天下之馬者耶蓋馬八尺以上則疑於龍矣是故謂之龍也坤之上六稱龍與此同義駟之頌一章曰有駟有皇有驪有黃二章曰有騅有駟有騂有騏三章曰有騂有駟有駘有騅四章曰有駟有騅有騂有騏按騅馬白跨曰騅黃白曰皇純黑曰騅黃騂曰黃蒼白雜毛曰騅黃白雜毛曰駟赤黃曰騂青黑曰騏青騅騂曰騂白馬黑鬣曰駘赤身黑鬣曰駘黑身白鬣曰騅陰白雜毛曰駟彤白雜毛曰騅豪駟曰騅二

目白曰魚魚今謂之環眼馬馬之最下者也言有驪有黃於前言有驪有魚於後每章愈下則以言僖公至誠成物有加而無已莊子曰百里奚爵祿不入於心故飯牛而牛肥思無邪思馬斯祖殆此之謂也

駒

馬二歲曰駒三歲曰駘八歲曰馱馬八歲一變故从八也語曰七驄八白言馬至八歲驄變而白矣傳曰大夫乘駒蓋駒血氣未定則有蹄齧之虞故大夫乘之荀子

曰大路之馬必倍至於教順然後乘之所以養安也倍言年長以倍今羣牧選馬十六歲以上乃以進御此遺象也曲禮曰齒路馬有誅路馬之齒高矣故齒路馬有誅所以廣敬也詩曰我馬維駒六轡如濡而後言維騏維駱維駟則騏也駟也蒙上之文宜皆為駒大夫乘駒駕三今曰六轡者上大夫卿奉使故也禮曰上大夫卿卿與諸侯駕四說文从句字音拘則以駒血氣未定宜拘執之馬爾詩曰繫之維之義蓋取此一章曰皎

皎白駒食我場苗繫之維之以永今朝所謂伊人於馬  
逍遙二章曰皎皎白駒食我場藿繫之維之以永今夕  
所謂伊人於馬嘉客古者朝食曰饗夕食曰飧飧薄食  
也故是詩於苗曰以永今朝於藿曰以永今夕逍遙以  
道言之也嘉客以禮言之也清人曰二矛重英河上乎  
翱翔二矛重喬河上乎逍遙翱翔禮之事也逍遙道之  
事也河上非所宜然因以微切其上故序者曰公子素  
惡高克進之不以禮文公退之不以道也舊說繫馬曰



維繫牛曰縷公羊曰牛馬維縷

駮

周官馬八尺以上為龍戎馬之高蓋亦准此故爾雅曰馬八尺為駮也駮即戎馬故其字指事而戎事齊力尚強故爾雅又曰絕有力駮也校人云種馬一物戎馬一物戎馬即駮是也種馬即龍是也史言良馬謂之龍種蓋出於此

埤雅卷十二

埤雅卷十二音釋

馮

布老

馮

之喻

馮

徒結

馮

原

馮

胡絹

駟

一人

駟

撥

駟

力才

駟

而弓

豔

艷

衰

茂

裕

何夾

駟

乃乎

褫

剝

駟

之誰

毳

芮

莖

逸

棘

妹

緇

側其

駟

合

經

徒結

駟

假華

駟

徒

駟

魚據

駟

之成

馮

知立

口

圓

駟

部田

鬣

列

嘽

啖

駟

何旦

駟

余桶

綰

七絹

綰

丑真

駟

思營

駟

古榮

駝

必皮筆

猗

於宜

凜

宜寄

駟

普悲

駟

力由

頰

髻

釐

就

驛

草

輶

竹留

驛

它

雜

洛

駟

胡加

驛

徒點

驛

力振

駟

遐諫

駟

徒高

駟

布夏

齧

藥